

2017 Churer Schnudergoofa

Nen Nuggi brauch ich immer noch, mir muss man ds Füddlen putzen,
die Schnudernase läuft und läuft, kann ds Naastuch nicht benutzen,
Im Znüütäschli, welch ein Puff hat's zwanzig Pitschgi drin
Allpot werd ich verseckelt, weil ich so glappat bin.

Im Turnen bin ich gschtartig und hoch gumpen kann ich nicht,
das einzig, was ich super kann, ist schlooten, glaubsch es nicht!
Den gröschten Murks, den habe ich beim Hirnen mit den Zellen,
dafür kann ich das jetzt ganz ring auf Hauchdeutsch euch verzellen.

Im Auto kheierend d'Auga zua, Sekundaschloof, oh Schreck!
Wenn's tumm lauft kann das tödlich sii, a Klapp und du bisch weg.
Dr Johann Schneider Amman meint, so gföhrlich khönns nit sii,
er bau bewusst Sekundaschloof in jedi Red mit ii.

Und was dä sait, das glaubend miar, dä Typ isch huara gschiid,
das sait au sini Kindergärtneri, d'Frau Ida Schmid.
Ds Johannli seg ds gröschti Wunderkind vu Kapstadt bis uf Schweda:
er heg mit füüfi schu so guat wia jetza khönna reda.

Vor acht Jahr händs ds Amerika dr erschti Schwarzi gwählt,
und jetz regiart an Orangscha: Das hät üüs grad no gfählt!
Miar froogend üüs schu, wia ma nu, sona Pfoschta wähla kann,
wo Spruch klopf und nu Schämpis suuft ir Hair-Force No1.

Vor drei Tag häts na undri tischt, a Virus ploggt na fescht,
dr Trump liggt mit knapp vierzig Grad und Schmerz am Glied im Näscht.
„No problem“, meint er, jetz wird halt vum Bett uus ds Land regiart,
dr Berlusconi heg das au fascht zwanzg Jahr praktiziart.

A Schtromuusfall kann furchtbar sii, im Fernseh hämmers gseh,
dia Doku vu SRF 2 hät üüs schu z'Denka geh.
Wenn nüt meh lauft, khei Lämppli brennt, khönnd miar eu garantiara,
dass d'IBC wird „Dunkelheit“ als Standard definiara.

A Blackout ohni Pfuus, das wär brutal zeigt Schwiz TeVau,
dr Tooschter schtreikt und d'Schtänderlampa und dr Fernseh au!
'S würd nüt meh go, 's wär tootaschtill, nu öppis täät nit hööra,
vu Züri her wüsch d'Schnorra vum Schawinski gliich no khööra.

Määntig Räge, Ziischtig Räge, am Mittwoch rägnets au!
dr ganzi Juni häts im letschta Summer pisst wia d'Sau.
Miar händ grundsätzliich wüschli nüt geg füächti Wuchanend,
's isch nu, dass miar üs dia natürli anderscht vorgschtellt händ.

Im Juli endlich Sunnaschii, schnuarschtracks in d'Badi Sand,
mit grossa Auga schtönd miar döt schockiart am Beckirand:
Uu huara gruusigi Tatoos uf Ärsch und Büuch und Gsicht!
Miar wünschend üüs reflexartig: Sofort Burkinipflicht!

Dr Poschtplatz gseht jetz andersch uus, dr Kreisel händs planiart,
au ds Müürli vum Calanda-Gärtli wärd' no amputiert.☒
Korrekt verpackt, schickends das Teil dänn uf Amerika,
döt gäbis eina, wo so Müürli, schiinbar bruucha kha.

Dänn suufsch schu bald im Gärtli halt, diis Piarli ohni Müürli.
Bi däm Verkehr isch das brandföhrlich und drum tüands natüürli
für d'Pensionära vur Stadt Chur ganz z'vorderscht reserviara.
Asoo hilft jedi Kollision, d'Pensionskassa z'saniara.